

## Zum Aufführungsrecht

- Das Recht zur Aufführung erteilt der  
**Theaterverlag Elgg**  
Stiftung amathea.ch  
Eigerstrasse 73  
CH-3007 Bern  
Tel. + 41 (0)31 819 42 09  
[www.theaterverlage.ch](http://www.theaterverlage.ch) / [information@theaterverlage.ch](mailto:information@theaterverlage.ch)  
Öffnungszeiten:  
Dienstag - Freitag von 09.00 bis 11.30 Uhr & 13.30 bis 17.00 Uhr
- Der Bezug der nötigen Texthefte - Anzahl Rollen plus 1 - berechtigt nicht zur Aufführung.
- Es sind darüber hinaus angemessene Tantièmen zu bezahlen.
- Mit dem Verlag ist *vor den Aufführungen* ein Aufführungsvertrag abzuschliessen, der festhält, wo, wann, wie oft und zu welchen Bedingungen dieses Stück gespielt werden darf.
- Auch die Aufführung einzelner Teile aus diesem Textheft ist tantièmenpflichtig und bedarf einer Bewilligung durch den Verlag.
- Bei eventuellen Gastspielen mit diesem Stück, hat die *aufführende Spielgruppe* die Tantième zu bezahlen.
- Das Abschreiben oder Kopieren dieses Spieltextes - auch auszugsweise - ist nicht gestattet (dies gilt auch für Computerdateien).
- Übertragungen in andere Mundarten oder von der Schriftsprache in die Mundart sind nur mit der Erlaubnis von Verlag und Verfasser gestattet.
- Dieser Text ist nach dem Urheberrechtsgesetz vom 1. Juli 1993 geschützt. Widerhandlungen gegen die urheberrechtlichen Bestimmungen sind strafbar.
- Für Schulen gelten besondere Bestimmungen.

*"Es gibt Leute, die ein Theaterstück als etwas "Gegebenes" hinnehmen, ohne zu bedenken, dass es erst in einem Hirn erdacht, von einer Hand geschrieben werden musste."      Rudolf Joho*

Simon Gfeller

# Hansjoggeli, der Erbvetter

Emmentalisches Mundartstück (1918)

nach der Geschichte von Jeremias Gotthelf

Bearbeitung: Rudolf Stalder (1978 / 1982 / 2005)

*Besetzung* 5 D/ 8H

*Bild* Bauernstube, Kostüme

**«*Myn Trooscht und Kraft, wi gseesch du dry!*»**

Die Geschichte vom reichen Erbvetter, der die Scheinheiligkeit seiner Verwandten durchschaut, sich dumm stellt und alle nicht nur an der Nase herumführt, sondern auch gerecht belohnt.

**«*"Ywändunge"! Tumme cheibe Chabis! Der Gwunger tööt se jo fasch!*»**

## **Personen**

<i>Hansjoggeli,</i>	der Erbvetter
<i>Bänz</i>	seine Patenkinder
<i>Bäbeli</i>	
<i>Annebäbi,</i>	<i>Wirtin</i>
<i>Züse,</i>	Bäuerin vom Huebach
<i>Mäde</i>	Bäuerin vom Grauech
<i>Lisebethli,</i>	Mädes Tochter
<i>Res,</i>	Kleinbauer im Hornbärgli
<i>Häiseli,</i>	Vehhändler
<i>Schlöjer,</i>	<i>Hauptmann</i>
der <i>Gerichtssäss</i>	
der <i>Zeuge</i>	
der <i>Doktor</i>	

### Wichtige Anmerkungen zur Bearbeitung

Entgegen falscher Pietät den Autoren gegenüber, muss beim Theater an den Texten gearbeitet werden, soll ein Autor "am Leben bleiben"! Grundsatz müsste dabei aber immer sein, dass die Aussage unangetastet bleibt! Hier ging es darum, den Dialog noch mehr zu straffen und Ausdrücke, die 90 Jahre später nicht mehr verstanden werden können, durch heute gängige zu ersetzen. Auch gewisse Umständlichkeiten im Handlungsablauf wurden reduziert.

## **Ort**

Emmentaler Bauernstube

## **Zeit**

um 1840

# **Erster Aufzug**

*Samstagnachmittag im Spätfrühling*

## **1. Szene**

**Bäbeli**

Häb do. I reiche gschwing d Noodle u vernäaje - es het besser. **Im Zurückkommen.** Wi hesch das eigetlig chönne?

**Bänz**

I ne Ascht gschlage han i, du het's mer ds Bieli abgsprängt u scho isch gscheh gsi.

**Bäbeli**

**im Nähn.** Söui chly Hutt o derzue nää?

**Bänz**

Ja, nimm di zäme u lueg, was de machsch! - Oi!

**Bäbeli**

Was oi, i ha di ömu nid gstoche!

**Bänz**

Aber bau!

**Bäbeli**

Isch nid wohr, das het de no viiu gfääut!

**Bänz**

Gwüss nid es Zimmermannshoor...

**Bäbeli**

Ja, wi viiu isch das?

**Bänz**

Öppen e haube Schue.

**Es klopft.**

**Bäbeli**

Het es nid topplet?

## **2. Szene**

**Wirtin, Bäbeli, Bänz**

in derTüröffnung. Woou, es isch doch öpper deheime, grüess ech.

**Bäbeli**

Nume yne, grüess di. Steu amen Ort aab.

**Wirtin**

Heit der Ungfeeu gha...

**Bäbeli**

Bau, der Bänz het si i ds Bei zwickt, drum hei mer di auwä nid ghöört.

**Wirtin**

**wissend, humorvoll.** Jäso... Isch der Chiuchmeyer nid umewääg?

- Bäbeli                   Der Ougeblick nid, er isch zu Grichts-Säässes übere go Fleisch reiche, si hei e Chue müesse lo tööde, er chunnt sicher gly zrugg.
- Bänz                   Un i sött dank o wider öppis go tue.
- Wirtin                  Pressier nid z fasch...
- Bäbeli                  Jo, süsch foot's de wider aa blüete.
- Bänz                   I wett mer drum nid lo vüürhaa, i hocki heiterhäue Tags i der Stube.
- Wirtin                  So öppis wirsch du jetze ha z schüüche. Dir zwöi, wo bim Vetter sövu viiu zeuit.
- Bänz                   Söttisch erfahre, win er mängisch sy cha!
- Wirtin                  Aber chuum gäge öjch! D Lüt säge gäng, dir chönnit ne einisch de erbe!
- Bäbeli                  Base, wo täichsch hii!
- Bänz                   Jojo, nume gföpplet!
- Wirtin                  Was gföpplet... dir syt ihm so nooch verwandt, wi di angere u de isch er ersch no beidne zäme der Götti, wiso sött's de nid chönne sy.
- Bänz                   Wiu bim Erbe di grosse Here voraachöme u di grosse Püürine, nid armi Chnächtli u Jümpferli!
- Wirtin                  Oo de Wirtine wird's ou nid der Huuffe zieh, die überchöme de öppen e Chabisstorze.
- Bänz                   Ds Höitli tääte si däich nid emol aanää!
- Wirtin                  Nää wurde si's scho, we si's überchäämti!
- Bänz                   Doch de!
- Wirtin                  Wärisch du besser, Bänz?
- Bänz                   Es chääm uf ene Probierer aa. Der Vetter söu mer nume tou lo verschrybe, ds Angere wurd si de scho mache.
- Bäbeli                  Mir wie jetz höre, vo däm rede, es isch em Vetter sy Sach.
- Wirtin                  Ömu ii ggönnti nech's säuft, Bänze u dir. Dir luegit em Chiuchmeier guet zu der Sach, es wär nid rächt, we der hingerab chäämtit!
- Bäbeli                  Jetz Base schwyg!

- Bänz* Jo, üsereim isch em wööschte, mi heig si schön stiu.
- Bäbeli* Der Götti wurd is, we mer ihm wetti dryrede.
- Wirtin* Das wär scho rächt, we's di ganzi Verwandtschaft miech wi dir! Aber we me gseet, wi si em Chiuchmeier chlütterle u täsele, mit de Chörbline louffe, schier Tag u Nacht u üsereim gö go schlächt mache wyt u breit, de tüecht mi doch de aube, mi sött ou chly derzue tue.
- Bänz* Ja mache tüe die, was si chöj.
- Wirtin* Drum wär es im Himu nid rächt, we si der Hof i d Finger überchäämti. Ömu der Houpme z Waschliwiiu äne söu de syner dräckige Finger amen angeren Ort go werme!
- Bänz* Ee jetz isch er ömu afe no do, der Vetter!
- Wirtin* Stimmt, er isch es zäächs chätzersch Manndl, der Oote plooget ne no nid es Bitzli. I ha chürzlige grad zu Mym gseit: do chöi di hungerige Verwandte no lang uf ds Erbe warte, der Chiuchmeier pängglet einisch no mit üsne Chnoche d Nüss ab de Böime.
- Bänz* Das chuum grad, es bööset ihm doch ou afe.
- Wirtin* Nu, er ma ömu gäng no Flouse ha. U wär ne nid kennt, gseht ihm chuum aa was aus hinger ihm steckt. Es het si scho mänge an ihm trumpiert: U glych: we di angere aui liebs Büüsseli mache, cha me ömu nid eleini bösi Chatz säge!
- Bänz* Prezys...
- Wirtin* Er het haut nid nume der schönscht Hof wyt u breit u ne Mordsschübu Gäut em Schärme - er het de ou no e Spycher vou Sache, wo eim chätzibocks kumod chäämti! Do näämti de scho gärn öppis dervo, das sägen i grad, wi's mer isch.
- Bänz* Jojo, das ggluschtet haut no mängi! Aber jetz wott i wider öppis go tue. **Ab.**

### 3. Szene

*Wirtin, Bäbeli*

*Wirtin* E gfröjte Püürschtu, dä Bänz - mi chönnt gwüss meine,  
er syg e Puresuun.

*Bäbeli* Tüecht's di...

*Wirtin* Syt der guet heicho, em Mejsunndi, wo der zäme by-n-is  
z Tanz syt gsi?

*Bäbeli* Em Meysunndi...

*Wirtin* Wäge dessi bruuchsch di ömu nüüt z schyniere, üsereim  
gseht haut auerlei.

***Geräusch im Hintergrund.***

*Bäbeli* Der Götti chunnt! I wott ihm go ds Fleisch abnää. ***Ab.***

#### 4. Szene

***Joggeli, Wirtin, Bäbeli***

*Wirtin* einen Moment siegreich lächelnd allein.

*Joggeli* langsam herein, ohni die Wirtin sogleich zu sehen,  
hängt den Stock an die Ofenstange. Du do, Base!

***Beide einander entgegen, Hand reichen.***

*Wirtin* Im Verbygang, gruess di Vetter! Was läbsch?

*Joggeli* I läbe – ***Lacht.*** ...u bbrichte gäng gärn es Wörteli mit  
der!

*Wirtin* Un iiig mit dir.

*Bäbeli* zur halb geöffneten Tür herein. Götti, d Base het der de  
ghroommet, es ganzes Bygeli Dreizinge! ***Geht wieder.***

*Joggeli* Das hättisch nid söue, für was Chöschte ha mit mer!

*Wirtin* Wär schi jetze derwäärt!

*Joggeli* Aber guet sy si natüürli, vergö eim aube ganz uf der  
Zunge!

*Wirtin* Jetz lächeret's di wider uf de Stockzänge, bisch doch  
gäng der glych -

*Joggeli* Ja, sött i de plääre, we's d Lüt so guet mit mer meine -

*Wirtin* Das scho nid, aber mi isch tumm dranne mit der... bisch  
en unkumooden Erbvetter!

*Joggeli* Was du nid seisch!

- Wirtin* Woou: bringt me der öppis, so lachisch eim hingerrucks numen uus u täjchsch: di schlängget ou es Würschtl na der Späcksyte...
- Joggeli* Jetz hör aber!
- Wirtin* Moou, i säge's, wi's mer isch: u täät me, wi we's überhoupt ke Chiuchmeier gääbti, wo Gäut het i aune Secke u Title uf aune Heimetline wytume -So chönntisch de glych vilicht täjche, mi heig di vergässe u frog der nüüt derno -u de chönntisch eim drum de o vergässe -
- Joggeli* Aha, du meinsch, das schüüch me -
- Wirtin* Natürlí, erbe tüe z letscht em Änd au Lüt gärn.
- Joggeli* Do chönntisch no öppis rächt ha.
- Wirtin* E jo: drum zuaget's em Nydlebode zue, wi gäge me Bejichorb. U drum steit bau a jedem Huseggen eini, wo wett zue der luege u der d Hushautig bsorge.
- Joggeli* Aber es isch doch schön, we me de Verwandte lieb isch.
- Wirtin* Nume git es doch de Ungerschide: teeu möge chuum gwarte, bis so ne Erbvetter d Ouge zuetuet - u teeu ggönnen ihm doch de es längs Läbe u aus Guete! Dertdüre bin i de hingäge suberi, das sägen i grad wi's mer isch.
- Joggeli* Drum tüeche mi jo dyner Dreizingge so guet!
- Wirtin* Jetz tuesch derglyche! Chasch haut aune Lütte styf bbricht, dass si meine, du gääbisch ne rächt. Drum meine de aube so Hagle wi der Houpme z Waschliwiu äne, si chönni mit der mache, was si wöui!
- Joggeli* Ja, we me Houpme isch, das wott haut öppis säge, do isch üsereim grad nüüt dergäage -
- Wirtin* E Lumpehung isch e Lumpehung, syg er dernäbe, was er wöu! I ma dä Hochmuetsgring nid schmöcke, geit üsi Wirtschaft go verbrüele i sibe Ämtere ume!
- Joggeli* Isch es ou mögli!

- Wirtin* U het säuber däwä Dräck am Stäcke! E settige Safti, wo scho angerhaub sturme wird, wen er nume amen Ort es Ggloschli gseet hange! *Sie geht zu Hansjoggeli.* Los Vetter: vermach dy Sach, wäm de witt, i weis, das es mi nüüt aageit u das i chuum viiu z erwarte ha, aber das säge der Vetter u das grad, wi's mer isch: we der Houpme der Hof überchunnt, da han i nüt me uf der! Heriesesgott, wurd das e Souerei gää im Nydlebode!
- Joggeli* I wett nid so Chummer ha, Annebäbi. Der lieb Gott wird scho luege, das my Sach einisch i di rächte Häng chunnt.
- Wirtin* Jetz verstecksch di wider hinger em liebe Gott!
- Joggeli* Ja lue Base, es het jede Möntsch syner Fähler. Mir hei ren ou - u der Houpme cha si no ändere.
- Bäbeli* *in der halb geöffneten Türe.* Götti, es isch e Heer dusse...
- Joggeli* Ja, was für eine?
- Bäbeli* I gloube, es syg der Vetter, wo Houpme isch.
- Joggeli* *lachend, mit Blick zur Base.* So heis ne i d Stube cho, so ne Heer loot me nid verusse schtoo.
- Bäbeli* *eher erstaunt.* Auso...
- Wirtin* I däm Fau wott mi dännemache, mit eme settige... so bhüet di Gott Vetter!
- Joggeli* Läb woou, Annebäbi u chumm gly wider!
- Wirtin* *trifft im Eingang mit dem Hauptmann zusammen und weicht ihm rasch aus, rafft das Kleid an sich.*

## 5. Szene

*Hauptmann, Joggeli (Bäbeli)*

- Houptm.* Grüess di, Vetter Chilchmeier, wi geit's der, was läbt me gäng?
- Joggeli* Es mues es tue, bis es besser chunnt. I cha nid chlage.
- Houptm.* Und ich taarf mi nid lang ufhalte, ich ha ds Fuerwärch by mer.
- Joggeli* Hock glych hurti aab, du bisch gly wider ufgstange.

- Houptm.* Jä, cha me si ufe Chnächt verloo, ich han es lüftigs  
Tierli ygspannet.
- Joggeli* Bänz wird scho luege.
- Houptm.* Jo äbe, grad seit mer der Gmeindschryber z Hablige  
äne, wi si imene schwirige Dilemma inne sygi wäge de  
bevorstehende Grossratswahle -will der alt Löjewirt  
gäng no am Sässel chläbi, will er mein, es gang nid ohni  
ihn.
- Joggeli* I wett säge, er syg e chennige, grade Maa.
- Houptm.* Also wäge de Kenntnisse, do mues i doch es  
Fragezeiche setze, er nimmt sech halt der Politik z  
weeni aa
- Joggeli* Derfüür liegt er deheime guet zur Sach, das isch ou  
öppis.
- Houptm.* Scho rächt, aber es sött eine de uf em Louffende sy,  
wen er son es Amt wott bekleide, das verlangt halt de  
bedütendi Opfer a Zyt und eh - Gält -Und jetz äbe,  
Vetter: düunkt es se gäng wi mee ich wär  
"Derjenigewelcher", ich sött mi unbedingt lo portiere,  
mir chönnt es nid fäale.
- Joggeli* Öppis hagus!
- Houptm.* Churz und guet: ich ha mer gseit: Es isch dy Pflicht, für  
ds Vatterland öppis z tue! Mi soll sys Liecht nid under e  
Scheffel stelle: A nes schneidigs, öffentlechs Ufträtte  
bin i scho vom Militärdienscht här gwanet und dass i  
nid chönn rede, wird öppe niemmer wölle bhoupte!
- Joggeli* Jää jo u das isch wichtig!
- Houptm.* Und de wär es en Ehr für di ganzi Verwandtschaft!  
Ratsheer hei mer no nie eine i der Familie gha. Und wär  
weis, was no cha wärde: my Arm reckt scho jetze bis uf  
Bärn ufe!
- Joggeli* Ja, es isch viiu mügli uf der Wäut...
- Houptm.* Dernäbe hei mer öppe miggerige Züüg gnue i der  
Familie!
- Joggeli* Da hesch rächt: miggerige Züüg.

- Houptm.* Mii dünkt es: Mir zwee, wo d Spizzi vo über wyt verzweigte Verwandtschaft darstelle, sötte zämehaa und enand unterstütze. Jede mit däm, won ihm ggää isch! Der eint het Rychtum - der ander Inteligänz und wenn me jetz do zämespanneti...
- Bäbeli* ***zur halboffenen Tür hereinsprechend.*** Es wär e Frou dusse un es Meitschi by re -
- Joggeli* Wohäär -
- Bäbeli* Si chömi vom Grauech -
- Joggeli* Aha, d Grauechpüüri! Es cha hüt wider einisch nid höre guetcho! Si wird öppe ou Fleisch greicht ha. - E nu, si söui ynecho.
- Houptm.* I däm Fall will ich aber verschwinde, mit dere...! Also adieu Vetter - und blyb mer immer hübsch gsund!
- Joggeli* Dank heigisch - adie woou.

## 6. Szene

*Mäde, Lisebethli, Joggeli (Bäbeli)*

- Mäde* ***blickt in der Türe rückwärts, rümpft die Nase.*** Mi sött wääger chly ds Pfäischter uftue! Wo dä düren isch, böckelet!
- Joggeli* De han i schynt's nümme di beschi Nase!
- Mäde* Alee Liesebetheli, gib doch em Vetter d Hang.
- Lisebethli* Grües di Vetter
- Joggeli* Botz tuusig, wi het si das Meitschi zwäggloo!
- Bäbeli* ***meldet zur Tür herein.*** I bi de i der Pflanzig, es isch dänk nid nötig, das i umewääg bi.
- Joggeli* Es isch guet, gang nume.
- Bäbeli* ***geht.***
- Joggeli* I bi säuber no imstang, nech öppis ufz steue.
- Mäde* Wäg üs schrys jo nüüt vüre, süsch gäu du Liesebetheli...
- Lisebethli* Mir hei jo no gha, gäb mer ggange sy.

- Mäde* So isch es, mir sy nid cho für z dorfe. Mir hei nume hurti wöue luege, wi der Vetter zwäg syg. Aber do bruucht me gar nid z frooge: Er gseht gäng no uus, wi wen er vierzgi war. Düecht es di nid oo, Lisebetheli?
- Lisebethli* Woou, es düecht mi gwüss oo.
- Mäde* Vetter, du gääbtisch bim tuusigli no der gfröiter Hochzyter weder mänge Zwänzgjäärigie.
- Joggeli* Du wosch säge, es wurd mi eini de no gradeinisch umelos!
- Mäde* Bisch doch gäng der glychlig Gspassvogu. Gäu Lisebetheli, der Vetter het schön Sache!
- Lisebethli* Schöön Sache, äuwäägg...
- Mäde* U ne settige schöne Hof!
- Lisebethli* Un es settigs schöns Huus!
- Mäde* Un e derigi schöni Hoschtert!
- Lisebethli* U de ersch der Garte!
- Mäde* U d Chuchi! Wär das es Glück, Lisebetheli, we du ou i re settige chönntisch choche! Es bsungersch Fürloch für d Söihärdöpfu z dämpfe.
- Lisebethli* U ne Schüftstei u ne Blättlibode.
- Mäde* Uuu, do chönnt's eini suber ha!
- Lisebethli* Do möcht me Tag u Nacht i der Chuchi sy, für em Vetter öppis Guets z brösele! **Putzt mit der Schürze die Nase.**
- Joggeli* Nume sött me de gäng mögen ässe.
- Mäde* We Lisebetheli chocheti, möcht de der Vetter scho. Söttisch gsee, Vetter, wi das si i der Chuchi weis z chehre! Do täät de ds Chupferschiir afo glitzere das me vorzueche chönnt strääle!
- Joggeli* Jetz lueg ou.
- Mäde* U was de Lisebetheli für nes Gfeligs isch mit em Söimeschte: Dir heit viiu schöni Stück im Rouch, aber we Lisebetheli di Söu hät i de Finger gha, d Späcksyte wäri de no nes Bröösmeli breiter u das wäre si! I däm

wird Lisebetheli niemmer Meischter! Steu der vor,  
Vetter, was über Söi gwoge hei: Di zwoo, wo mer fürt  
too hei, über acht Zäntner u hei fasch nume böös  
Härdöpfu übercho!

*Joggeli*

Es schöns Gwicht, in der Taat.

*Lisebethli*

U we me de no Vettersch Fuettterschig hät, huu, do  
wär öppis z mache! **Putzt mit der Schürze wieder die  
Nase.**

*Joggeli*

**steht auf.** Un jetz heit es Ougeblickeli Geduud, i wott  
öppis Zoobe reiche, doch ou es Glas Wy -we ds Bäbeli  
nid i der Pflanzig war, müsst es is es Ggaffee mache .  
**Ab.**

## 7. Szene

*Mäde, Lisebethli*

*Mäde*

O Vetter, mir chöj's guet ohni! Mir sy nid desstwäge  
cho.

*Lisebethli*

Lo ne doch, da söu is nume öppis gää!

*Mäde*

Putz mer de nid no einisch mit der Schöibe d Nase.

*Lisebethli*

Du machsch es ömu ou so!

*Mäde*

Aber nid vor em Vetter, Chüetitti du! U red, win i di  
bschuelet ha!

*Lisebethli*

Zersch muesch mer es Lückeli loo -

*Mäde*

Du rüehmsch in, ii säge der Räschte! Muesch di doch  
wärt mache bim Aute! Nim d Häng unger d Füess lege  
u "vetterle" - täich, wen es is grooteti!

*Lisebethli*

Es treit öppe glych aus nüüt aab es macht ihm  
aubeinisch so kurlig um d Nase un um ds Muu ume -

*Mäde*

Däm hesch du di gar nüüt z achte.

## 8. Szene

*Joggeli, Mäde, Lisebethli*

*Joggeli*

**herein mit Wein und Gläsern.**

- Mäde* Alee, Lisebethli, hiuf doch em Vetter! **Schenkt eilig allen ein, schneidet Brot ab.**
- Joggeli* Ds Brot u der Chääs stö uf em Chuchischaft -
- Lisebethli* **steht unentschlossen.**
- Mäde* Uf em Chuchischaft het er gseit!
- Lisebethli* Aha - **Gemütlich ab.**
- Mäde* Das isch mer jetz scho bau chly zwider, so mitts im Namittag -
- Joggeli* Er röjt mi ömu nüüt!
- Mäde* Das glouben i gärn Vetter, bisch gäng e Guete gsi.
- Lisebethli* **mit Brot und Käse herein.**
- Joggeli* So, u jetz mache mer Gsundheit.
- Lisebethli* **stellt Brot und Käse rasch ab, ergreift eilig ein Glas, putscht mit dem Vetter hefig zusammen.** So Gsundheit, Vetter.
- Mäde* **auch sie stösst an, dann mit vollem Mund.** Gäu Lisebetheli, der Vetter het guets Brot!
- Lisebethli* **ebenfalls mit vollem Mund.** Auää!
- Mäde* We de gäng settigs hättisch! De chäämti der de di rote Backe! U öppe einisch es Schnäfeli Fleisch un e Schluck Wy derzue, ee wär das es Glück! **Mäde und Lisebethli essen und trinken mit grossem Eifer, Mäde schenkt fleissig ein - Hansjoggeli nimmt nur wenig, er hört zu, beobachtet.**
- Mäde* Ds ganz Joor chunnt Lisebetheli nie vo deheime furt, vor lutter wärche -
- Joggeli* Mi sött e junge Möntschi nid z fasch aabinge.
- Mäde* Fryli, das cha me säge, aber we eis sy Fröjd deheime het! Lisebetheli isch haut eso! O Vetter, bi däm isch es schön chrank z sy! Was meinsch, Lisebetheli, wettisch blybe? **Schenkt fleissig ein, isst und trinkt dauernd.**
- Lisebethli* Däichwoou wett i blybe u mer Müej gää, so hert, das i nume chönnt.

- Mäde* Ee wi wird dä Vatter Ouge mache, wen i eleini hei chume! Aber i Gottsname: er wird si haut o müesse dryschicke -U plääär mer nid öppe, Lisebethli, der Vetter wird scho zue der luege -u wird der de einisch dradänke, dass de synetwäge Vatter u Muetter verloo hesch!
- Joggeli* Grosse, mächtige Dank, dass der sövu für mi tue wettit -aber i ha Lüt, mee weder gnue u ds Bäbeli wett i nid furtschicke, so mitts us em Joor use. Für das isch es z lang byn is.
- Mäde* Jo nu auso, we de meinsch. Dernäbe Vetter, gloubsch es nid, was vo däm Möntsch für Sache bbrichtet würde, win es di hingergang un es nüütnutzigs Trüecht syg: ganz Sunndige ghej es mit em Bänzu i de Wirtshüseren ume u tüej, das me si mües schäme! Mit däm dörftisch ömu säuft abfahre!
- Joggeli* D Lüt bbrichte mängs! U das Bäbeli z Tanzsunndig isch, a däm bin i sogar säuber tschuud, i han ihm's drum aaggää.
- Mäde* Nu jetz, i wett de do wytersch nüüt -Aber Lisebetheli isch doch de ne Puretochter.
- Joggeli* U grad wäge däm isch das nüüt für ds Lisebethli...
- Lisebethli* Derby wäri so gärn doobblibe, der Vetter hät nüüt bbruucht, weder disne z befähle, si müessi mer fouge, i hät ne de d Hüenner gly ytoo!
- Mäde* Gseesch de nid Vetter, wi das Ching a der hanget u für di wett luege!
- Joggeli* Woou, scho, aber sövu chönnt i gar nid aanää - es söu sy, wi we der mer'sch too hättit! U Lisebethli chan i glych es Zeiche tue - **Geht in die Nebenstube, schliesst die Türe.**
- Mäde* Los, i ha ne Töjbi, aber wart er nume, dä tonnersch Gnöppeler: wei de luege, gäb is nid glych no z Stang bringi, das Bääbi us em Huus z tue! **Packt rasch je ein Stück Brot und Käse ein.**



<i>Joggeli</i>	<b>im Zurückkommen.</b> Lue, do hesch öppis, chouf der derfüür, was di fröjt.
<i>Lisebethli</i>	Nei, i nime's nid, we me em Vetter doch nüüt cha tue!
<i>Joggeli</i>	Jää, i ha der'sch de nid e Haubstung zueche!
<i>Mäde</i>	So nimms u dank. Dernäbe sy anger Lüt em Vetter schynt's lieber.
<i>Joggeli</i>	Treichit doch no öppis, dir heit jo chuum versuecht!
<i>Mäde</i>	<b>trinkt rasch aus und schenkt nochmals ein.</b> Mir wei jetz lieber ufbräche, de sy mer em Vetter nümm im Wääg. <b>Trinkt rasch aus.</b> U schuudige Dank für aus.
<i>Joggeli</i>	<b>ihr die Hand reichend.</b> Nüüt z danke. Adie Base - adie Lisebethli -Der Vatter löoj i fründtlig grüesse.
<i>Lisebethli</i>	Wius de verrichte, adie Vetter - <b>Geht rasch der Mutter nach.</b>
<i>Joggeli</i>	<b>sinnend, nach einer Verschnaufpause.</b> Heiterefahne, hei die jetz z Bode gha! I gloube, i gang no chly i d Wässermatte. <b>Wendet sich der Türe zu, die sich öffnet.</b>

## 9. Szene

*Häiseli, Joggeli*

*steht in der Türe.*

<i>Häiseli</i>	Jetz hesch aber Zyt gha, grad han i fört wöue!
<i>Joggeli</i>	So han i's schynts exakt preicht! Gueten Oobe Vetter, isch me zwääg -
<i>Häiseli</i>	<b>eigentlich müde.</b> Es geit, chum yne.
<i>Joggeli</i>	Wott nume gschwing öppis cho abgää - i bi do grad im Oberland gsi, um Vee uus u ha cheibe guete Chääs ufgablet. I säge der, gar chätzersch fyne, miud u zart win es sächzächerjärgs Meitschi. Täichen i: hoppla, so ne Chröttu nimmsch mit der, da chan er bysse, der Vetter Chiuchmeier. <b>Entnimmt einem Tüechli einen kuchengrossen Käse.</b>

- Joggeli* Du bisch doch gäng der Beseht! So a ne aute Vetter z täiche. U derzue no im Oberland obe. Aber hock aab, myner Wässermatte louffe mer nid dervo.
- Häiseli* Jäso, du hesch wöue go wässere...
- Joggeli* Fryli, aber für das brueht es nid unbedingt mi. Es wär nid witzig für nes auts Manndl, z meine, es gang nid ohni ihns. We men au Necht der Tod mues erwarte, sorget me derfür, das eim öpper cha ersetze.
- Häiseli* Ja, hesch de öppere, wo d ihm das Wässere chasch aavertroue, das lehrt me nid i eim Tag!
- Joggeli* Der Bänz chunnt öppe mit mer, der Mäucher, no nes Jungs Piüürschteli, es guets, flyssigs -i bin ihm der Götti. Aber jetz wei mer zämen es Glas Wy treiche, wen er de scho grad zwägsteit.
- Häiseli* Ee e Schnabu vou chunnt mer grad nid unkumod. I treiche nümme so ugärn wi fruecher. **Er schenkt ein, trinkt sogleich.**
- Joggeli* Du wirsch gäng starch im Handu sy.
- Häiseli* Bi längerschi erger! I weis nid, werum d Lüt meine, si chönni nume mit mir handle. Anger verstö doch ou öppis! Aber der Veehandu isch drum e gschliferige Handu, do cha me eis zwöi e Schueh vou usenää.
- Joggeli* Sys Lehrgäut zale mues jede.
- Häiseli* Aber de ganz sicher! Hingäge, we me afe die Erfahrig het, won iig haa ...u we der Vetter öppen e Uftrag hät, wett i ne versorge, wi ne no niemmer versorget het. I ha fryli Bstelige, das i fasch drinn mues erworgge. Aber für e Vetter Chiuchmeier, hoppla, das wär den en angeri Sorte Härdöpfu, das zug de auem vor!
- Joggeli* Zersch nä mer jetz afen e Schluck.
- Häiseli* Ganz wi de witt - **Sie stossen an.** Aber sorge wetti de, dass de öppis Raarsch überchäamtisch. I bi bekannt bis z oberischt i ds Oberland. Ungfäxiert! U d Händler säge gäng, si handli mit niemmerem lieber weder mit mir.
- Joggeli* Das wird me der müesse gloube. I mym Staau isch so nes Ygricht. - Es schadti vilicht nüüt, we me chly öppis

täät ändere. Aber i wett der nid ou no e Stei uf d Burdi lege.

*Häiseli*

Was redsch do, i wär stouz, wen i der en Uftrag chönnt usrichte. Dii cha me nid mit de angere zämezeue! I ha do vori hurti i Staaau ynegugget - nüüt für unguet, aber üüs Händler nimmt das gäng em meischte wunger! Es het natürli scho Ruschtig, wo me churzum sött usenää...

*Joggeli*

Was du nid seisch!

*Häiseli*

Los i mues der'sch säge, gang es woou oder übu: Für so ne berühmte Hof gseht es windig uus! Heiterefahne, im Nydlebode, won es sövu Sache git u wo me ds Gäut mit der Tennschufle cha ufmache, sövu schlächt versorgeti Waar!

*Joggeli*

Du chönntisch eim bau erchlüpfe! Red use, wo fääut es de!

*Häiseli*

Düürhaar, a aunnen Orte! D Hutt rytet ne nüüt!\* (\*gewollte alte Redewendung) D Utter verwahrloset! Hoor zwüsche de Hörnен, das me's chönnt züpfle! U ee weder niid no ne Huuffe Lüüs drinn! Aus im Dräck, sowyt me gseeht!

*Joggeli*

Ma scho sy, das i nümm aus gsee...

*Häiseli*

Nei, verstang mi rächt, Vetter, nid du bisch tschuud dranne! Tschuud isch dä, wo se sött mäuchen u fuetttere! Es wäri scho no rächtli Stück drunger, we besser zue ne gluegt wuurd. Aber dä Gaugestrick wird si öppé nid Zyt nää u meine, si sötti grad es haubs Chloofter frässe ungereinisch. Er wird öppé Sachen im Gring ha, won ihm wichtiger sy, weder mischte u abschoore. Däich ou em Wybervouch nochefaare u desumelöitsche bis z Nacht am haubi dryzäächni.

Derigs wär mer nid ufgfaue...

*Häiseli*

Mi gseet's doch scho em Mischthuuffen aa, bi däm Veestang sött es doch eine gää zwöi Stockwärch hööch - u Bschütti e ganze See! Es gloubt's e ke Möntsch, was eim so ne Kärli i eim einzige Joor schade cha! We der dä nid besser zum Häärd luegt aus zu der Waar, bisch en

arme Vetter! Du chasch ou froh sy, muesch nid zinse,  
süsch brung di dä no über nüüt bevor de uf em  
Chiuchhof wärisch!

Joggeli

Das isch mer jetz ömu oo! Das es sövu leid usgsääch,  
hätt i nid ggloubt!

Häiseli

Es louft haut afe viiu Gsindu uf der Wäut ume, we teeu  
scho Vetter zu eim säge.

Joggeli

Do chönntisch öppis rächt ha, settig git es. Es isch ömu  
guet, dass d mer das seisch. I gse haut d Lüt numen  
ussefer u chume gar weeni i der Wäut ume.

Häiseli

Aber anger git's de richtig ou, wo nid däwääg sy.

Joggeli

Mir wei's scho hoffe! Richtig, teeu lüüge, was zum  
Gurgu uechemaa u suuffe, was zum Gurgu achemaaau,  
di dräckegi Seeu steicht ne bständig zum Muu uus! Aber  
zu dene ghöörsch du öppe wius Gott niid! Süsch wetti  
de lieber, i hät nüüt gseit.

Häiseli

**doch etwas betroffen und unbehaglich.** Bewahr mi der  
Lieb! E settige schlächte Tonner schämti mi z sy! I wott  
nid säge, das i kener Fääler heig, aber wäge der  
Relegion cha mer de niemmer nüüt vüürhaa! Botz  
verfluechteib! U ds Vatterland isch d Houptsach u ds  
Vouk obedruff, botz himusackermänt abenangere!  
Aber für no einisch uf dy Waar zruggz choo, ömu di  
zwo Vorderische söttisch abstosse.

Joggeli

I glouben ou, für die wär es em mingschte schad.

Häiseli

Guet, i tue der e Bärnmetzger zuehaa, dass d se churzum  
los wirsch.

Joggeli

U wi hei mer'sch mit em Ersatz?

Häiseli

Hee los, näächschi Wuche mues i uf Erlebach ueche.  
Dert chouffen i zwöi Staatsrinder für di, wi de ne kener  
hesch im Staau gha - un im Prys, wirsch gsee!

Joggeli

Es wuurd mi fröje.

Häiseli

Aber en angere Mäucher söttisch zuechetue, däm  
Chöözi, wo de jetz hesch, guub i de settigi Prachtswaar  
ugärn i d Finger! I vierne Wuche wäre si der scho vom

- Fleisch ghejt u ds haub minger wärt! Das war doch de o verfluecht!
- Joggeli*                   Aber woħär de grad en angere nää?
- Häiseli*                Los, do wüsst der eine, so eine chunnt landuuf landaab ke zwöite vüre. Dä chönnt i der scho di neechschte Tage schicke.
- Joggeli*                Hübscheli, hübscheli! Das gieng mer woou gleitig! Däwäg dryschiesse isch nie my Fau gsi. Es wird de scho öppen en Aalass gää, won i mit Bänze cha abrächnie u won er de überchunnt, was er verdienet het. So mir nüüt, dir nüüt Chnächte furtjage, mitts im Joor inne, isch nid mys Gschäft. Lieber der Schade ha, weder der guet Name verlüüre.
- Häiseli*                Jäänu, mir cha's jo glych sy. Auso, söu i zwöi bringe?
- Joggeli*                Mira, aber de ganz schöni! Was wosch für Gäut? Tüe's 300 Guude?
- Häiseli*                Es isch zwar durchuus nid nötig, dass du mir Gäut vorschiesisch - i ha ne Huuffe Usstehends u bi dene, wo mi kenne, han i Kredit.
- Joggeli*                Do druuf cha me si nid verloo, mi handlet viiu ringer, we me bar zale cha.
- Häiseli*                So isch es - nu de -we de grad guet versee bisch, Vetter, nimen i scho gärn öppis mee, es lüf eim no mängisch e Schick aa, we me ds Gäut grad i der Tasche hät.
- Joggeli*                Auso - wi viiu sött es de sy
- Häiseli*                He mynetwäge öppe so 600 Guude.
- Joggeli*                I bi gagewärtig ou schier uf der Tröcheni, aber wiu duu's bisch, will i's mache. **Geht in den Nebenraum, Häiseli spielt den Sieger.**
- Joggeli*                **im Zurückkommen.** D Lüt meine gäng, mi heig Gäut z sääje - We mer öpper schuudig isch, zale si mi nie, oder ömu de gäng zletscht - drum hätti's de gärn rächtzytig ume.
- Häiseli*                Vetter, da chasch druf zeue, wi uf Gottes Wort.

*Joggeli* I wett das nid zäme uf d Zunge nää, i ghöøre das nid gärn.

*Häiseli* Tue mer doch nid jedes Wörtli uf ds Wöögli lege, Vetter, i bi gottlob e fromme Chrischt u nid eine vo dene Nöjmodische. Jetz no wäge der Farb...

*Joggeli* Nid wyssi, die sy gäng dräckig. We si nume guet sy, das wär o bi de Lütte d Hountsach.

*Häiseli* **hat es plötzlich eilig.** De wiu i de jetze nümme d Zyt abstäle! So aadie, Vetter!

*Joggeli* Adiewoou. **Selbstgespräch, nach Gewohnheit alter Leute.** Wider eine gfeerget - Chöme ächt no mee - de söu mi doch de der Gügg... **Horcht bei der Türe.** Es wird ds Bäbeli sy **-Öffnet einen Spalt weit.** Du Bäbeli - !

## 10. Szene

*Joggeli, Bäbeli*

Bäbeli

*erscheint, trocknet Tränen ab.*

Joggeli

Ruum do aab, es wird jetz woou Fride sy. **Sieht sein verweintes Gesicht.** Was isch de mit dir - hesch Zangwee?

Bäbeli

*verneint, schluchzt erneut auf.*

Joggeli

Wo fääut's der, red!

Bäbeli

*ist unfähig zu antworten.*

Joggeli

Chasch nid vüre mit der Spraach? Het der öpper öppis too?

Bäbeli

*verdeckt schluchzend das Gesicht.*

Joggeli

Was git es z plääre!

Bäbeli

**bricht aus.** I wott furt! No hinecht!

Joggeli

So! Bisch du ume Verstang cho! Was söu jetz das heisse!

Bäbeli

Das wirsch du woou wüsse!

Joggeli

Wen is wüsst, frieg i dänk nid! Wi wett i chönne wüsse, was dir ungereinisch i Chopf gschlossen isch. Red jetze, du muesch de nächär i d Chuchi.

Bäbeli

Für was - i cha jo glych nüüt rächt mache. Drum gon i lieber, bevor d mi furtjagsch.

Joggeli

Wär redt de do vo furtjage, tumms Meitli du! U wär seit, i syg nid z fride mit der.

Bäbeli

*schaut zu Boden, schweigt hartnäckig.*

Joggeli

Dii het öpper ufgreiset, wär isch es gsi - Meitli, jetz vüre mit de Charte!

Bäbeli

**sehr unsicher, muss sich zwingen.** We me si druf verloo het - mi heig e Möntsch uf der Wäut, wo's no guet mit eim mein - u mues de erfahre, dass er ou e Fautschen isch - das mues eim ds Härz abtrücke...

Joggeli

Meitli, bisch du verrückt! Wär het di in es settigs Züüg yne gwärchel - Uskunft!

Bäbeli

Isch das öppe nid fautsch, we me eim Gäut git u seit, du muesch jetz ou einisch e Fröjd ha - chasch jetz ou

einisch z Tanz - u mues de hingernoche erfahre, das es numen e Fauen isch gsi - für eim de chönne nochezrede mi syg es liederligs Trüecht, wo em Mannevouch nochefaaar...

*Joggeli* So, jetz chumen i der Gschicht uf d Spur! Do cha fasch nume d Grauechpiüüri derhinger stecke, was het si der aaggäää, red!

*Bäbeli* Si het mer verbotte, öppis z säge.

*Joggeli* Wiu's gglogen isch! **Fasst Bäbeli derb am Arm.** Use mit der Spraach!

*Bäbeli* **erschrocken.** Si isch vori zue mer i d Pflanzig usecho. Du jagisch mi de churzum furt, du hättisch em liebschte gha, we si iher Tochter grad doogloo hät – oh settigs tuet wee!

*Joggeli* I ha's doch täicht, di auti Chiere steck derhinger, mues ihrer Finger gäng i auem inne ha - Es tüecht eim nid vergäbe, es louf eim e Schnägg übere blutt Äcke, we me se ghöört rede. Aber wart si nume, mir sy no nid fertig zäme! U du Meitschi söttisch mi dochafe chly kenne, sövu Joor wi mir jetz scho binangere sy! Aber nei, do mues nume so ne Gläcktasche cho d Ggoschen uftue - so gloubsch ere uf ds Wort u mir trouisch aus Eländs zue! Chennsch du d Wäut no nid besser!

*Bäbeli* Herieses Götti, git das sövu fautsch Lüt!

*Joggeli* Auwág git es, drum lo der das e Warnig sy.

*Bäbeli* Es isch mer leid, Götti, es angerschmoou weis is de.

*Joggeli* U bis i Zuekunft offe gäge mi, i säge's ou, we mer öppis nid passt.

*Bänz* **draussen, heftig.** Mach jetz, dass de ändtlige furtchunnsch u haut ds Muu, süsch nime di i d Finger!

*Bäbeli* Zürn mersch doch rächt nid, Götti!

## 11. Szene

### **Bänz, Bäbeli, Joggeli**

*Bänz*                    **im Eintreten.** Vo däm nimen i das nid aa!

*Joggeli*                Mit wäm hesch Chritz -

*Bänz*                    E mit däm Braschaueri, wo do isch gsi! U jetz möchti  
wüsse, wora das i bi! Dä isch mir cho der Staaу  
schlächtmache, was i dert für ne Lumpeornig heig!  
Wen i nid hät gwüssst, dass's e Verwandte isch, i hät ne i  
Schoorgrabe ghejt. Dert hät ihm de sys Lugimuу  
töfflet! U jetz isch däich gschyder, i pack myner  
Chleider u gang es Huus wytersch.

*Joggeli*                Das chaisch, we's di fröjt, hingäge wett i mi no bsinne.

*Bänz*                    We d mersch öppe no säuber gseit hättisch, aber das  
me für das e Frönde mues dinge!

*Joggeli*                **zornig.** Du bisch e tummen Esu! Meinsch würklech, em  
ene Püürschteli, wi du eis bisch, töörf i nid no säuber d  
Lüüs abemache!

*Bänz*                    Werum isch de dä so cho plaraagge!

*Joggeli*                Ömu nid, wiu ihm's befole ha.

*Bänz*                    Aber du hesch ihm doch Gäut ggää für Chüe z chouffe...

*Joggeli*                I gloube, das syg no my Sach!

*Bänz*                    I meine's o nid eso - aber er het drum bhauptet, är heig  
jetz d Ufsicht übere Staaу.

*Joggeli*                **So**, het er gseit. So merket ech jetz das, dir heit uf  
niemmere z lose, weder uf mii. U wäge de Verwandte  
näät ech in Acht, was der säget. U we si nech wei  
ufreise, wüsset der, won i bii u win is meine - u jetz gööt  
go mache.

*Bäbeli*                Es isch mer eso zwider.

*Bänz*                    I ha de do wytersch ou nüüt...

*Joggeli*                **allein.** Dir wüssit haut nid, wo d Chatz im Höj ligt - D  
Lüt hei's dertdüre au glych, öppis Schlächts gloube si  
viiu ender, weder öppis Guets - u sibe Lugine gö ne  
gleitiger yne weder en einzegi Warheit.

***Blackout / Vorhang***

© Nicht kopieren Theaterverlag Elgg

## Zweiter Aufzug

*Sonntagnachmittag. Joggeli leidend im Lehnstuhl, eine Wolldecke über die Knie. Res vom Bärgli sitzt bei ihm, Bäbeli und Bänz am Tisch, beide lesen.*

### 1. Szene

*Joggeli, Res, Bänz, Bäbeli*

*Joggeli*

Pricht no chly mee, i lose gärn - Es het mer gäng gfaue, bi öjch im Bärgli, dert obe heit der no ne gueti Luft -

*Res*

*alles schlicht und absichtslos.* Nu - chly stotzig isch es -aber mi gwanet si a aus u mir chömen ömu für. Ds Häärdli besseret si vo Joor zu Joor u gwachsen isch viiu dä Summer, do chönnti nid chlage. Ds Höj hei mer guet ynebbroocht, ganz weeni bbrägnets - richtig z schwitze git's aube, we me aus mues yneträäge.

*Joggeli*

Du hesch de gäng no kei Yfahrt zur Büni -

*Res*

Wen i s einisch vermaa, mues es de sy u wär me de dranne, sött me d Firscht no öppis verlengere - mir sy gäng e chly knapp mit em Platz.

*Joggeli*

Wi heit dersch mit em Obscht -

*Res*

Bire git es, hingäge mit de Öpfle sy mer nid breit -di junge Böimli sy no nid noche u mit de eutere Straffle isch es vüür Zersch hei mer gmeint, es hangi no ordli dobe, aber jetze sackets niid u choorbets nid.

*Joggeli*

I chönnt der e Schübu Surgrauech gä, we si nume grad byn ech obe wäri.

*Res*

Do seiti nid nei. Mir wäri froh drüber - der Winter isch läng - u de isch es churzwylig, chly Öpfuschnitz z schnouse. Auso de schicken i d Buebe mit em Chare. Bis z hingerscht i Grabe möge si's zie - u dert leit me ds Güschtli aa. Si hei's leere zie un es cha's scho fei styff -

Jetz, we mer no Zyt zum Wäge hätti u Schnägge, de gieng is aus d haube ringer. Nu, mi cha haut nid aus uf ds Moou u d Buebe wärde o gäng stercher. We mer nid Ungfeeu hei, chunnt es scho guet.

*Joggeli* So söue si cho mit Chare u Secke, soviiu si möge zie tüe mer ne de gärn uflege. Bänz, du weisch es jetze.

*Bänz* Vergisse's scho nid.

*Res* So sägen i vergäuts Gott, z tuusihundertmoou. Wen i chönnt, wetti gärn oppis derfüür tue.

*Joggeli* U de das feine Waabehungg, wo d mer bbrunge hesch! Säge ömu de der Frou, win es mi gfröjt heig.

*Res* De sötti jetze go, wen i zum Mäuche wott deheime sy.

*Bäbeli* Götti, es wär no es Bitzli guete Chääs abghoue...

*Joggeli* De tuesch ne em Vetter i ds Chörbli u paar schön Chüechliöpfu derzue.

***Bäbeli ab.***

*Res* ist aufgestanden, reicht Joggeli fast scheu die Hand. So bhüet di Gott, Vetter - er wöu der vergäute, was de an is too hesch.

*Joggeli* Danke - u grües mer dy Frou. Um mii sorget ech nid. I bi lang gsung gsi u ha's schöner gha, weder mänge. Jetz mues is nää, win es chunnt. Bhüet di Gott - u dyner Lüt ou. **Lässt die Hand los.**

*Res* Es isch mer ömu e Trooscht, dass zue der gluegt wird.  
**Geht zu Bänz.**

*Res* Tüet ihm no, was der chöjt. **Setzt die Kopfbedeckung auf.** So wiu i jetze goo. **Türklinke leise drückend ab.**

*Bänz* Wen es mi hie grad nid nötig hät, wär i no gärn i Schlungacher hingere, wo mer morn wei säje. U de glouben i, es rünn dert e Tone, dä chönnt i mer de grad flicke.

*Joggeli* Aber fang de nid hüt scho aa dermit. U de gang no gschwung i der Ankematt verby, em Grichtssääss go säge, er söu doch hinecht no übere cho, i wett oppis mit ihm.

<i>Bänz</i>	Guet. <b>Geht, an Bäbeli vorbei.</b>
<i>Bäbeli</i>	Möchtisch e chly Tee?
<i>Joggeli</i>	I bi nid mögelige.
<i>Bäbeli</i>	Oder söu der chly vorläse, es wär jetz schön stiu.
<i>Joggeli</i>	We d magsch - lose tuen i gärn.
<i>Bäbeli</i>	Was söu i der...
<i>Joggeli</i>	Lis mer der 121. Psauum.
<i>Bäbeli</i>	<b>blättert, findet.</b>
	"Ich hebe meine Ougen ouf zu den Bärgen von welchen mir Hülfe kommt. Meine Hülfe kommt von dem Herrn, der Himel und Ärde gemacht hat. Er wird deinen Fuess nicht gleiten lassen und der dich behüetet, schläft nicht. Der Herr behüetet dich, der Herr ischt dein Schatten über deiner rächteten Hand.“
	<b>Es klopft stark.</b>
<i>Joggeli</i>	O wettsch! Es wird für hüt no nid aus düre sy - yne!

## 2. Szene

### *Züse, Joggeli, Bäbeli*

<i>Züse</i>	<b>herein, mit Säcklein bepackt.</b> Grüess ech! Eh myn Kraft, was han i jetz müesse schleipfe a der Ruschtig! Ganz vo Oote ghejt bin i, i hät o gschyder ds Fuerwärch gno.
<i>Joggeli</i>	So wett i afen absteue u luege z hocke.
<i>Bäbeli</i>	<b>will ihr die Säcklein abnehmen.</b> Chan i häuffe...
<i>Züse</i>	Nüüt do, das mues i säuber! Du muesch mer de nid no d Züpfle verheje! <b>Legt ihre Sachen ab - Hände in Hüftstütz.</b> Ee myn Gott und Vatter, wi hesch du gleidet u gschlächtet! Vetter, Vetter! Wär hät das chönne

sinne, dass du so abechäämtisch! Dä Hustage han i gmeint, wi du no chäche sygisch u no lang nid müessisch stärbe, un jetz geit es sövu gleitig mit der z Bode! Wi nötig wär es jetze, dass rächt zue der gluegt wuurd!

*Joggeli* Es wird scho zue mer gluegt, Base.

*Züse* Hättisch de sövu gschitteret!

*Züse* **betrachtet ihn forschend.** Myn Trooscht und Kraft, wi gseesch du dry! Jetz hät me der haut söue zuehaa, vo ei'r Tagheiteri zur angere! U jetz hesch däich nid emol öpper, wo der wachet u Tee abschüttet! Das isch jetz nid guet ggange, gar nid guet. Hätt i doch ds Mareili mitgnoo! Das hät der abpasst un ygstosse, hingear u vorfer - Es hät si de möge d Müej nää, du wärisch de nie eso abechoo!

*Joggeli* Solang i mer säuber cha häuffe, tolen i nid, dass mer öpper wachet u ystosst!

*Züse* So redt me, we me niemmere het, wo's eim von ihm fröjt! Mareili hättisch de möge lyde! U d Sach hätter de aagschlage.

*Bäbeli* Du meinsch ou gar, mir mögi em Vetter nüüt z lieb tue!  
*Züse* Hoo, es wird mängisch kurios go im Nydlebode! We me no so nes ungglesürst (Ausdruck aus der Töpferei, noch ohne Glasur, also unfertig) Tüpfi isch wi du! Aber das mues mer jetz ändere, i mache Mareilin eis Chlapfs us em Wäutsche heichoo, so lon ii der Vetter nid z Grung go.

*Joggeli* Pressier nid z hert. I cha ke frönde Möntschi bruuche, ha Lüt gnue im Huus!

*Züse* Frönde Möntschi! Mareili isch dänk bei frönde Möntschi! Won es der doch fruecher het d Hushautig gmacht!

*Joggeli* Ganz glych! Das töörfi ii nid verantworte, dass es us em Wäutsche heichääm u d Spraach de nid gleert hät. U was wurd de ersch ds Grauech-Mädi säge, wo mer

sys Liesebethli so grüüsli a ds Härz gleit het! Nenei, mir  
lö di Gschicht em beschte so, wi si isch!

Züse

Wirsch is hoffetlech nid mit dere uf em Grauech  
zäimezeue. Die mit ihrem Lisebetheli! Das wett der däich  
de aus im Söjhafe choche. Mee weder öppe Härdöpfu z  
gschweue isch das Babi doch nid imstang! U  
ggerggelige dörftisch de nid sy, Vetter, nid es Brösmeli  
ggergelig, süssch müesstisch de verhungere! Lisebetheli  
isch gar wasserschüüch!

Joggeli

Aber sy Muetter het's doch eso ggriühmt!

Züse

Du wirsch nid öppe sövu chindtlige sy u dere öppis  
gloube, Vetter! Die lügt doch, so mängisch dass si ds  
Muu uftuet! Du hesch de Lütte haut gäng z guet trouet.  
Mit der Bärewirti isch es ds glyche.

Joggeli

Aber si chöi doch beide so styff bbrichte!

Züse

Söttisch di Mäde einisch ghöore, we si deiheme  
ustonachset, wooumääu! Die fluecht jo em Tüüfu d Ysen  
abb! We si die einisch gstreckt het, mues me dere de ds  
Muu no äxtra mit em Brändtlhammer z tood schloo.

Joggeli

Mhm, si wär nid di erschti!

Züse

Nei, d Bärewirti ma se no fasch, die isch de derzue no ne  
Fuli! Die steit nie vor de sibne-achte uuf!

Joggeli

Si het ou speter Fürobe weder anger Lüt! Aber wosch  
jetz nid ändtlichen abhocke.

Züse

Uuhaa! Zersch wird jetz no uspackt! **Kramt in ihren  
Sachen.** Lue, i ha der do e Züpfen bbroocht. Nume isch  
si nid usechoo, win i gärn hät wöue. Dä Hudubeck het  
mi aagschmiert. Zwöi Maas Chorn han ihm bbroocht,  
zwöi Pfung Anke u zwöi Totzen Eier - u de früschi! U  
ha gmeint, was das für ne braavi, murbi, chüschtegi  
Züpfen gäab! U jetz macht mer dä Scheum es  
bleichsüchtigs, lumpigs Schiirbeli, das i mi mue schäme  
derwäge! Es chönnt's jo es Huen im Schnabu  
furrträäge! U bbache isch si, dass Gott erbarm! Aber i  
cha bim Chrottecheib nüüt derfür. **Wirft das Ding auf  
den Tisch.**

- Joggeli* I säge einewäag vergäut's Gott.  
***Es klopft.***  
*Joggeli* Geisch du go luege, Bäbeli, u bring de e Gutter vou Wy –  
***Bäbeli ab.***  
*Züse* Isch nid nötig, ds Zimis het jo no nid verrumplet! U für z dorfe bin i nid cho. I hät der de no öppis z säge unger vier Ouge - wäge Mareilis Chleiderrächning - du hesch jo gseit gha, was ihm söu lo mache...

### 3. Szene

#### *Wirtin, Joggeli, Züse*

- Wirtin* Grüess ech, mitenangere!  
*Züse* **rückt verärgert etwas abseits.**  
*Wirtin* Chumen ech öppe chrumm dry?  
*Joggeli* Gar nid, nimm der nume Platz.  
*Wirtin* **im Absitzen.** Wi geit es mit der, Vetter?  
*Joggeli* Es tuet mer ömu niene weh.  
*Wirtin* Abgnoo hesch...  
*Züse* Em Vetter sött haut jetz ganz angersch abgwartet würde!  
*Wirtin* Ds Bäbeli tuet sicher, was es cha.  
*Züse* Wen es nume so wär!  
*Wirtin* Du bisch ömu vo mene gsunge Chäärne.  
*Joggeli* Äis woou - my Grosmuetter isch 97i worde u mi seit, das vererb si.  
*Züse* Aber der Grosatt isch junge gstorbe!  
*Joggeli* Wiu er ab ere Chiirschileitere gfauen isch. I ha's mit em Stärbe, wi das Froueli, wo bbätet het, der Hergott söu's zuen ihm nää aber pressiere tü'e ihm no nüüt!  
*Züse* I weis nid, gäb me über settigs sött spöttle!

## 4. Szene

*Bäbeli, Züse, Wirtin, Joggeli*

- Bäbeli* herein mit Flasche und Gläsern. D Base het der e Fläsche Wy gchroommet.
- Joggeli* I danke der, Annebäbi! Du meinsch es doch gäng em beschte mit mer. So nes Schlückeli guete aute Wy man i gäng no em erschte.
- Züse* Ja, tuet er der de guet? Das isch bi aute Lütte mängisch so ne Sach.
- Joggeli* Usgezeichnet tuet er mer! Es düecht mi aube, i jungi bi me niedere Schluck.
- Wirtin* Wäm wett es Tröpfli aute Macon nid guet tue!
- Züse* Du chasch scho säge, we me nume i Chäuer cha go nää - Was üsereim gää cha, het der Vetter säuber. U wett me öppis lo mache bim Beck, so stiut eim dä Huduhung ds Haube!
- Wirtin* Do hät i jetz no nie gha z chlage - Fryli geben ihm de aube o Sache gnue.
- Züse* I däjch ou!
- Wirtin* Werum chlagt de der Beck gäng - Dä Mittag isch er e Schoppe cho nää - er mües der Erger abeschwäjche. Do chömi di Purewyber mit eme Seckli Choorn u mene Gägeli räheligen Anke u de sött me ne druus e Züpfe mache wi nes Zwöijäährigs!
- Züse* Lugihung, was er isch!
- Wirtin* U schlööj me d Eier uus, syge di haube dervo fuli
- Züse* Der Gring schlon ihm aab, däm Teiggaff! We d's de nid Öppe nume ersinnet hesch...
- Wirtin* So het er'sch gseit vor der ganze Gaschtig.
- Züse* Nid für ne Rappe chouffen i däm me aab!
- Joggeli* U we men jetze di Zupfe aahöju chly dervoo versuechti! Bääbeli, hou sen aa - gööt zueche, Froue!
- Wirtin* I begääre nid dervo.

- Joggeli So näät ömu es Glys Wy u machit Gsundheit!  
Wirtin Danke, Wy han i deheime säuber - **Steht auf.**  
Joggeli Aber chumm de gly wider, mi vernimmt ou gäng öppis!  
U schööne Dank!  
**Es klopft, Bäbeli öffnet, der Hauptmann tritt ein.**  
Wirtin So adie, Vetter, gäng gueti Besserig!

## 5. Szene

### *Hauptmann, Joggeli, Ziüse, Bäbeli*

- Hauptm. D Wirtin het schynt's nid ds beschte Gwüsse, dass si auimoou ds Päch git, wenn ich chume. **Er nickt den Anwesenden herablassend zu, reicht Hansioggeli drei Finger.** Do gseet me wider, wi ggloge wird uf der Wält obe. Der Vetter syg toodchrank -ds Grab syg ihm scho gschuflet! Und jetz gseet er genau so munter uus wi sünsch!
- Joggeli Hättsch es bau lieber angersch?
- Hauptm. Wi channsch so öppis aanää! Im Gäge teil, usspanne söttisch einisch, Vetter! Chly zue der luege! E Badekur mache. Das würd der exzellänt aaschloo!
- Joggeli Was weis i nöje, mir isch es deheime gäng no am wööschte. U seisch jo säuber, win i guet usgseej!
- Hauptm. Natüürlech isch dy frej Wille, aber wenn de Loscht hättisch, würd ich mit Adrässe gärn diene. A propos, das ich's nid vergisse, di Wahlangelägeheit isch denn im beschte Gang!
- Joggeli Isch es ou mügli!
- Hauptm. Ich cha der Bewys leischte! **Entnimmt der Brieftasche ein Papier.**
- Joggeli Cha me's ohni Brüue läse -woou, es isch grosse Druck - Soso — mhm — in der Tat —henu -vile Wähler - gute Oussichten! De chan es jo nid fääle! **Gibt Papier zurück.**

- Hauptm.* Natüürlech, Opposition isch vorhande! Finde het jede... d Wirti hät chönnen Ufschluss gää! Ire Maa weiblet gäge mi, wi kei zwöite.
- Joggeli* Wiso het er di de uf der Latte - we me doch verwandt isch!
- Hauptm.* Ach myn Gott, will ich z weeni im Bären ychehre! Aber ich cha doch nid i jeder obskure Beiz Stammgascht sy!
- Joggeli* Ömu i bi aube no gärn dert ygcheert - si hei reale Wy.
- Hauptm.* **lächelt überlegen.** Das isch vilicht chly Gschmacksach...
- Züse* Em Vetter wird si haut vom Bessere vüregää! Mir hei einisch Sichletewy vom Bäre gha, na dreine Tage isch er bblüemet gsi!
- Joggeli* I cha nüt gäge Bärewirts säge.
- Züse* Wiu de so ne Liechtlöibige bisch! We d se kenntisch win iig - i so mene Wirtshuus geit gar mängs!
- Joggeli* Ja, weisch öppis bestimmt's...
- Züse* Mi isch wöhler, mi rüehr dert nid im Dräck, süsch het me uf ds moou no ne Prozäss am Haus.
- Hauptm.* We mer de scho grad bi däm sy, es sy ou no angeri Verwandti, wo me nid viil Staat cha mache mit ne! Chürzlech isch mer vorhalte worde, wenn me Grossrat woll würde, sött me de nid Verwandti ha wi der Chalberhützer Häjseli, wo der Stroossegrabe mit der Nasen usschoori.
- Joggeli* Ja, füut er schi de no, der Häjseli.
- Züse* Eh myn Kraft, Vetter, weisch du nid, was das für nes Suflueder isch !
- Joggeli* Aber der Veehandu kennt er.
- Züse* Ds Bschyssen oo!

*Hier endet die Leseprobe  
Möchten Sie das ganze Stück lesen? Anfordern auf:  
[www.theaterverlage.ch](http://www.theaterverlage.ch)*